

一統盛舉此天之大造我

國家者也每日焚香不絕是冬十一月得欽州
老貢士馮紹齡殘缺數卷云覓之山家舊窖
中嘻天不愛道地不愛寶廉之文獻有徵夫
非

昭伐隆運使然歟取而閱之首卷朽蠹已亡其
半餘缺一二章一二行及數句者有之乃故
明崇禎九年兵備叅議張公郡守鄭公輯本
也然而予心滋戚矣有原本無續本致崇禎

九年以後暨

皇朝初載以來事蹟不彰一慮也有殘卷無全
卷卽舊卷原編不能成集一慮也荒服之區
老成淪落屬員寥寥鞅掌簿書而予也夙慙
鄙俚兼之郡務倥傯奚堪輯字校文則執管
乏人又一慮也不得已暫騰殘帙分發同官
田子益齋及各邑令學博儒生等輩校正魯
魚亥豕擬補夏五郭公更於公署前置精舍
供蔬食延明經士子各殫採集委閒員府幕

林有聲及教官尹自選等胥爲校輯力董厥成甫百日稿始脫予忘固陋時出臆見以叅正之是則罪我者分固應爾夫是集也大約故明崇禎以前多屬舊錄

創興之初事鮮稽考順治十三年定版之餘案籍散失非有確憑未敢溷入誠慎之也舊者補之新者續之聞非一人筆非一手原無郢工未知作者誰氏聊爲次第以備採輯之萬一爾若云成書而佐太史資司牧則未也擬

於政務餘閒聘倩宿學相與酌古準今稍爲
裒益使義類是非井然可見以付梓人垂不
朽幸矣有志未逮尚其俟之

皆

康熙十二年癸丑仲春知廉州府事三韓徐
化民撰

重修郡志原題辭

嘗讀左氏外傳彷彿十五國風意之所至則
言及之劉子政以爲優於內傳取其言之簡
也若夫當必欲求詳之日處不得不畧之勢
而故老久之傳聞野乘絕少旁蒐以致土風
物宜多所闕畧則第師外傳之遺意而供十
五國風之采斯已焉君子以爲是不必求備
也粵東有廉郡風所稱三山五湖勝槩也太
守之清風可挹將軍之偉伐如在謂必有編

年紀事勒爲郡乘藏名山而傳之其人者而
灰燼之餘杳然不可復問矣

刺史徐君慨然以興復古道爲己任觀其經
營制作百廢俱振劬勞安宅靡事不究蓋數
年以來城郭人民舉非其舊已隱然有一圖
誌在其胸中焉而特以爲弔古詢遺俾往蹟
湮沒弗彰是皆繼起者之責也矧今

聖天子嘉意採輯將彙成一統全書顧令數百
年內海疆佚事不克備天祿石渠之蒐羅尤

日夕與同官者鯁鯁慮之爰檄取州邑殘編
延集諸儒增損成帙會值鍾雨拮据艚艘未
獲緝閱從事而以府幕林有聲董其成雖編
年紀事不知有合于信史與否然試一展卷
而經國則兵農並舉謀野則租庸畢悉一命
之榮於物皆有所濟十室之邑忠信尚有其
人載筆而志不敢或誤也若乃鼎新之後傳
聞異辭則寧慎毋濫徃徃闕而弗書斯亦意
之所至則言及之君子不病其簡而弗詳也

歟異日者經各憲臺筆削論定而以邦國之
誌上諸太史俾廉之士風物宜亦得與輶軒
採擇則鍾雨雖奉職無狀所當鑑古而知得
失者矣爰題辭以附其末

皆

康熙癸丑歲仲春日公安田鍾雨謹題

成化癸巳志叙

包顯祖

合浦人懷
集教授

古者列國皆有史以司紀載而事事物物記焉後世列郡有志蓋本乎此苟或廢而不修則事物渙散無統將何所據哉廉古合浦也雖逖居瀕海然自漢孟嘗還珠之後遂爲名郡其山州之秀物產之奇殆非他郡可擬達人君子宦遊於此往往以清節著稱士生其間漸詩書而由科目亦未嘗無其人也與夫事物之所當志者不一而足但古志弗存已

不可考繼而作者多冗雜失次輿論歉焉成
化乙丑宜山邢公直夫奉璽書來知府事修
廢舉墜之暇因閱舊志繁簡不倫思欲釐而
正之迺囑顯祖偕靈庠教諭周弘重爲修輯
顧余衰邁曷足勝任辭不獲黽勉從命遂與
周君同心戮力淬精畢思博搜載籍旁詢故
老兼以見聞所未及爲參訂前志之遺逸者
收之闕畧者補之謬誤者正之志其繁而從
其實事則增於前文則省於舊其間容有所